

LA PATRIE DAL FRIÛL

SFUEI MENSÏL INDIPENDENT

Direzion e Aministrazion - Udine - via del Cotonificio 129

Tassa pagata / Taxe perçue Udine Italy - mensile / mensil spediçion in abonament postâl Poste italiane s.p.a.

LINT AUTONOMISTE



Ancjemò un an passât tra lis solitis injustiziis


Dree Valcic

❖❖ “Cjalâsi lis spalîs” e je une espression che e va ben par descrivi un stât di alerte continui par ce che al pues sucedinus, ma “cjalâsi daûr des spalîs” al è ancje un mût par fâ un belanç di ce che al è stât fat tal passât. A Dicembar dal an che al sta par sierâsi, o podìn cun tranquilitât afermâ che, par ce che al tocje il Friûl, no je nissune diference.

❖❖ O vin di constatâ che nol è cambiât nuie intes sieldis che a vegnin fatîs intai nestrîs confronts e che, ce che di simpri al ven denunziât tant che atac sistematic ae idee stesse di Friûl, al continue intrepit la sò azion di propagande. Magari che si tratàs dome di peraulis – pericolosis tant che sarpintis, par altri – ma purtrop si trate di fats, ats e decisions politichis concretis. Se o analizin i mès passâts, o podìn notâ cemût che aromai la concezion di un sòl centri dominant inte economie reâl de Regjon al vedi il non di Triest, o pes cundizions favorevulis che a son daûr a disvilupâsi ator dal puart, o pal centralisim esercitât in funzion di capitâl. Se o vin di simpri denunziât – e chel “simpri” al dîs che lis cundizions di partence no si son modificadis – il sbelançament dai podês a pro de citât juliane, no podìn no constatâ cemût che chest al risultî ancjemò plui rinfuarçât. Al bastarès pensâ ai fonts europeans che a son daûr a rivâ, par notâ la lôr destinaçion favorite: e chest no – atenzion! – par une sorte di striament, ma pe presince di strategjiis futuris in stât di sigurâ il lôr ûs. Brâfs lôr, potis nô che si cjatin cuntune classe politiche e imprenditoriâl buine dome di pensâ al so interès imediât, freantsi dal dut dai interès coletîfs.

❖❖ Ma par fâ passâ in mût indolôr cheste manovre, si à di butâ jù in maniere definitive il concet stes di Friûl, dineant la sò esistence, inagade intun brût re-

(al va indenand a pagj. 2) ►



EDITORIÂL

A e fin dal 2021, cjârs letôrs de “Patrie”, nus tocje strolegâ ce che al covente augurâsi pal an che al ven. Prin di dut sperin che nus rivi une bugade di... bon sens, parcè che al somee che al mançji. Nus ven di cjalâ cun marum ce che al sta capitant al nestrî Friûl, che in Dicembar al è tornât in “zone zale”, ma che soledut si è bandonât a un destin inciert che nissun mâc o induvin al savarès previoidi.

◆ Se par frontâ la emergjence sanitarie e larâ doprade la tierce dose di une vacine che e esist, pe emergjence identitarie che il Friûl al è daûr a frontâ di un pieç nol somee che e sedi nissune soluzion sot man. Anzit, i imprescj e lis iniziativis che a vignaran metûts in vore cul Plan Gjenerâl pe tutele de lenghe furlane che la Regjon e à presentât il mès stât, a son za declarâts tant che un mût no par rilancjâ e slargjâ la pratiche dal furlan, ma par ridusi il procès ireversibil che al sta puartant la lenghe dai nestrîs paris viers de estinzion. No cognossin ni il timp ni la ore, ma il nestrî

compit al è slontanâ plui che si pues il moment là che fevelâ furlan al deventarà un ricuart. Al è un sfuarç che nissune istituzion, ni la Arlef, ni la scuele, ni lis realtât privadis, e nancje i mieçs di comunicazion a puedin fâ di bessôi. Chestis realtâts no bastin: nus covente un popul.

◆ Al sarès biel podê sperâ che il 2022 nus puarti une gnove cussience, e che pe identitât furlane e cressi une gnove Primevere. La braûre des lidrîs e sarès un biel spadon di sfodrâ cuintri dal mostri dal declin: altrîs popui in Europe a son stâts bogns di dimostrâlu, dai

Basc ai Galês, cence fevelâ dai Catalans e dai Scozês. Dutis Nazions cence Stât, ma che si son ricognossudis come une comunitât di destin peade di une lenghe e di une storie che a son lis fondis de lôr peculiaritât. E nô furlans? Di cui sino fis? Dal “Milite Ignoto”?

◆ Inte nestre storie o sin colâts tantis voltis, ma nissun al dubitave di jessi part di un popul e che il furlan al fos la nestre lenghe, e Aquilee la nestre mari. Cumò salacor o sin tornâts al 1932, al timp che Pieri Masut intal so “Pronostic” sul “Strolic” di chel an al diseve scunît: “e la lenghe di Çorut / bandonade e je pardut”. In ché volte al jere il Fassio a tibiâ i dirits linguistics, cumò invezeit inte democrazie dal benstâ a son i furlans stes a vè lassât lâ in dismentie la robe che ju rint originâi e unics. A restin in pôcs, come nô, come voaltris, chei che no si rindin. Cuiassâ se, passât il burlaç, o rivarin a fâ un inventari di dut ce che si à pierdût? In ogni câs, bon finiment e bon principi. Chel che al vignarà al sarà un bon an, dome se al sarà furlan... ■

LA BRAÛRE DES LIDRÎS CUINTRI LA PÔRE DAL DECLIN

Walter Tomada

❖ a pagjine 3

SINDIC JO MAME

Viaç ae scuvierte
di cui che al vuide
i Comuns furlans
di Dree Venier

❖ a pagjine 5 e 12

PATRIARCJIS FÛR DAL ORDENARI E IL FRIÛL VIODÛT DAI SCRITÔRS

di Diego Navarria
e Agnul Floramo

❖ a pagjine 7

CJAPE LA VACJE PE BORSE

La gramatiche di une lenghe
muarte no ti lasse nancje
la meste cul lat
di Enos Costantin

❖ a pagjine 10

INTERVISTE A PAOLO PATUI

Il rindicont di “Tramis
Pontadis”
di Alessio Screm

LINT AUTONOMISTE

(al va indenant de prime pagjine)

Ancjemò un an
passât tra lis solitis
injustiziis

Dree Valcic

gjonalist fat cul dât e no cu la cjar. E se di furlans si à di fevelâ, a van relegâts intal rûl di minorance, buine par jessi citade in maniere folcloriste, dismenteant che a rapresentin invezit la maiorance e che a produsin la grande part dal redit regjonâl.

*** Dut chest si lu viôt clâr cu la campagne vergognose de zonte Fedriga sul teme "Io sono FVG", acronim offensif pe storie e pe realtât dai fats. Un "logo" che al somee un nûl tossic che si slargje, a sun di contribûts, di Tarvis a Lignan, di Sacil a Cormons, cjapant drenti lis nestrîs ecelencis, costretis a rinunziâ ae lôr originalitât identitarie.

*** Cuant che duncje o fasìn un belanç, visinsi di ce che si ripet in maniere puntuâl, di ce che al somee passât e invezit al torne a comparî, magari in forme di vierse, ma cu la stesse sostanza. E cjalinsi daûr des spalîs par no dismenteâlu, ma soledut par individuâ cui che di simpri a chescj plans no si opon, in non di une "coesistence pacifiche" che e mostre i limits di simpri.

*** Intai agns '60, cun chest tiermin si usave a definî la prove di no beligerance in at tra Americhe e Urss. Pecjât che intant i arsenâi si jemplant di missii nucleârs e che al fos il Tierç Mont, i plui debii, a paiâ il presit. E se vuê il Tierç Mont o fossin nô? ■

LA SGRIFE

La laurea *honoris causa*
a Gabrielli e tradis
la mission de Universitât

Redazion

Propit inte ore plui scure dal Friûl, cuant che i efets de "grande depression" prime, e de pandemie dopo, a son daûr a mostrâ debilecîs impuartantis inte sô economie e inte sô classe dirigente, la Universitât dal Friûl e mande un messaç ambigui. E varès di vê, daûr de leç e dal so stes Statût (art.1) ancje "...l'obietif di contribuî al progrès civîl, sociâl e ae rinassite economiche dal Friûl" (art. 26 L. 546/1977). Ma i ultins Retôrs a son lâts daûr di chest obietif simpri cuintricûr, cirint di barcjemenâsi tra la mission aziendâl plui tradizjonâl, o ben sigurâ didatiche e ricercje, e il dovê di adempî ancje al mandât istitutif. Il Retôr De Toni al veve provât a passâ la difficile dialetiche, inventantis il "Cantiere Friuli". Però cumò, propit intal moment che e je plui bisugne di ricostruzion, di chel "Cantîr" no si viodin plui segnâi di vite. Il Retôr di cumò no si mostre masse disponibil a meti in vore chel mandât, forsit pe pôre di posizions che a sepin masse di "politiche". Cheste, fin îr, e podeve jessi une spiegazion acetabile ma vuê - dopo de laurea Honoris Causa al Sotsegretari di Stât dotôr



Franco Gabrielli - no baste plui. Cheste decision, di fat, e pues vè interpretazions diviersis ma dutis cuntun contignût valorîal e politic fuart e univoc. Il probleme nol è, dal sigûr, la persone in se che e je degne di stime e di massim respit. Il dotôr Franco Gabrielli al è un alt funzionari dal stât, cuntun curriculum ecezionâl (ex cjâf de Digos di Rome, cjâf dal Sisde, responsabil de Protezion civîl, prefet, cjâf de Polizie e cumò sotsegretari cun deleghe sui servizis segrets e la sigurece dal

Paîs), che si è distint in compits grivis di ordin public e di protezion civîl post disastri, ma di une prospetive che si pues definî "di emergjence" e "siguritarie". No si vûl sostignî, che al sedi clâr, che cheste prospetive - che e à di jessi garantide dal stât - no mereti ancje di jessi ricognossude e premiade in sede academiche. Ma si vûl sostignî, invezit, che nol varès di tocjâ in maniere primarie ae Universitât dal Friûl fâsi paladine di chest. Cheste, di fat, par coerence valorîal, e

varès, prime di dut, di onorâ une vision dal stât opueste a chê "siguritarie" e "di emergjence". In tiermins cetant semplificâts, o podaressin di che la lidris dal Model Friûl e de Universitât dal Friûl - che e je la citade leç di ricostruzion - e valorize une idee di stât e di democrazie che a vegnin dal bas, de polis (no dome la Universitât e ven domandade dal popul furlan, ma saressial mai stât un Model Friûl cence i intervets storicis di Glesie Furlane e cence dal rûl fundamentâl dai Comitâts des tendopolis?). La lidris siguritarie e fâs riferiment, invezit, a une idee centralistiche - par no di autoritarie - dal stât, che e sotlinee plui il "monopoli de fuarce" che l'ûs de partecipazion, de solidarietât e de sussidiarjetât. Si à di ricuardâ, par altri, che la Protezion civîl di Bertolaso e Gabrielli, in maniere tant diferente di cemût che al veve operât Zamberletti in Friûl, e à imponût a LAquila un regjim cuasi militâr inte vite des tendopolis, e à poiât chel model tremant clamât "Cjasis" (o ancje "new town") che al à disfât il tiessût sociâl e urbanistic di LAquila za tacant de prime fase de ricostruzion. La Universitât dal Friûl e fâs une virade di 180 grâts cuntune sielte politiche e valorîal cetant fuarte: e cjape sù la lidris prefetizie e siguritarie dal stât cuintrî chê plui costituzionâl in maniere proprie (il prof. Mario Bertolissi, costituzionalist de Universitât di Padue, al à definît il Model Friûl di ricostruzion tant che la atualizazion plui complete de Costituzione taliane). Il Retôr Pinton al varès di sclari, duncje, propit inte ore plui scure dal Friûl, ce mai che e vedi a ce fâ la laurea ad honorem a un sotsegretari Gabrielli, dut cás cetant respitabil, cu lis lidris e cui valôr di fonde de Universitât dal Friûl. ■

INT DI CJARGNE

La coltivazion biodinamiche
inte aziende Puntel di Cleulis

Marta Vezzi

La aziende agricole biologjiche di Ursule Puntel e je nassude in maniere uficiâl tal 2008. O sin a Cleulis, frazion dal comun di Paluce, a 900 metris sul nivel dal mâr. "In realtât - e dis Ursule -, la aziende no si sa cuant che e je nassude: si trate di une aziende familiâr di chês che duçj a vevin in Cjargne une volte, cuntune vacjute, un ort, un cjamp. Duncje, o ai puartât indevant ce che e veve mê mari e prin di jê la famee di gno pari. Cuant che mi è rivade a mi, judade dut cás simpri di mê mari, o vin pensât di dâi alc in plui ae aziende, certificante cul biologjic. Nô o lavorin in maniere il plui pussibil natural, no doprin prodots o acoltis tossics. Il ledan des bestiis al va dret a coltâ i nestrîs terens, prâts e cjamps e cuant che o



vin problemis di pedoi o alc altri tes plantis, o fasin decots e impacis cu lis jerbis. Al è di agns che o vin une coltivazion biodinamiche - ancje se no le vin mai certificade, parcè che no rivin a stâ daûr in maniere scrupolose a duçj i details -, ma dut chel che o podin fâ o cirin di fâlu, tignint di voli in ciertis lavorazions no dome la lune che e cale o che

cres ma ancje il dislontanâsi o il svicinâsi de lune ae tiere, tignint cont de energie des costelazions e dai planets. Di chescj studis si ocupin di plui mê mari e mê agne. Se une di o ai di lâ a gjavâ lis cevolis, ur domandi a lôr. Dut chest nus da un tic di ritmi, massime cuant che tu âs tancj cjamps e no tu rivis a vè dut regolâr. Cun

chest sisteme, tu âs un ritmi e tu rivis a stâ daûr ancje al rest. Nô o vin ancje animâi - dôs vacjis, dôs cjavris e cuindis gjalinis -, e di Istât o vin i prâts di stâur daûr. Se jo no ves l'aiût dai miei gjenitôrs e dai miei fradis, ma ancje dal gno om e dai miei cuatri fis, no rivarès a fâ tant. Daûr dal gno non e je une aziende di famee e al è un lavorâ insieme. Nol è nuie di difcil."

◆ Il fat di jessi in mont e di coltivâ prodots biologjics al puarte cun se une strade in salide. Di fat, Ursule e dis "Il gno lavôr plui grant al è chel di stâi daûr ae burocrazie che mi impagne un grum di timp. Invezit di slizerinus, nus cjamin simpri di plui e nus gjavin energjûs. Di cuant che o sin biologjics, o vin une o dôs visitis ad an di control, e la mê aziende e je considerade compagne di chês grandis: la burocrazie che e fronte la mê piçule realtât e je compagne di chê di une aziende cun 500 vacjis.... Tai controî, i ispetôrs si fermin une di interie e a visitin dute la aziende e lis coltivazions. Par chestis, o ai di compilâ un registri indulâ che o segni dut ce che o semeni, il gjenar di semence che o dopri, indulâ e cuant che le

compri, ce che o vent e la cuantitât che o vent... par fortune che no mi domandin ancje a di cui! In chei dis li o soi gnervose parcè che o vûl vè dut a puest, e ogni volte che mi controlin al mancje alc... E cussî mi rive la "no conformitât" che o ai di risolti intal timp di 60 dis, se no mi gjavin il biologjic."

◆ Ursule e à ancje un laboratori di trasformazion dal lat indulâ che e prodûs doi gjenars di formadi: une formadiele frescje di 4 - 6 setemanis e un formadi cremôs sot vueli; intun altri piçul laboratori si fâs la lavorazion e la sielte des jerbis che a coventin a Ursule par prontâ tisanis unichis. I siei prodots si puedin cjatâ ogni lunis, di 5 agns incâ, tal Marcjât dal contadin di Tumieç.

◆ La sô e je une grande passion, compagne di una grande volontât. Lis fadiis no mancjin e e rive a pêl a cuvierzi lis spesis, ma e dis: "o cir di dâ l'esempli ai miei fis e di cjapâju drenti tai lavôrs de campagne, però al è impegnatîf par me. Ce che o volarès che a capissin al è che al è un ben pal teritori: nô o seîn dut e il nestrî paîs al è biel net. O tignin a cheste tiere." ■

SINDIC JO MAME

Une cunvigne de ACLiF par... no vè pòre di vè coragjo

«Il furlan e altris lenghis minoritariis te aministrazion publiche»: une cunvigne inmaneade de ACLiF che e pues stiçà i nestrìs aministradòrs a jessi plui coragjòs. Cualchi esempi: in Sudtiròl si fasin concors publics su la fonde de apartignince al grup linguistic e in Val di Aoste la liste regionâl dai segretaris

Dree Venier



A ÇAMPE, IL PRESIDENT DAL CONSEI REGIONÂL MAURO ZANIN AL FEVELE VIE PE CUNVIGNE. A MAN DRETE IL PRESIDENT DE ACLIF MARKUS MAURMAIR E ALESSANDRA VANONE

«*I furlan e altris lenghis minoritariis te aministrazion publiche*: chest il non de cunvigne inmaneade in Novembar de ACLiF, la Assemblee de Comunità Linguistiche furlane, a Vile Russiz di Caprive. Ospits dal sindic Daniele Serгон, in presince o in colegament, aministradòrs publics di Friùl-Vignesie Julie, Trentin, Sudtiròl e Val di Aoste par stiçà i aministradòrs publics, soredu chei furlans, a promovì l'ús de lenghe locâl intai rapuarts cui citadins. Confronts utii par stiçà i nestrìs aministradòrs a jessi plui coragjòs tal fà rispìetâ i dirits dai furlans di fevelâ (e di scrivi) la lôr lenghe ad implen.

◆ Tacant de sudtirolese **Magdalena Amhof**, Presidente de Comission Afârs istituzionâi de provincie di Bolzan, che e à ricuardât i pilastris de tutele de popolazion todesce dal Sudtiròl che a partissin dal censiment dulà che i maiòrs di età, anje i imigrâts e i gnûfs residents, a àn di declarâ la lôr partignince a un grup linguistic (talian, todesce e ladin), e su chê fonde si assum personâl tes publichis aministrazions e si dan servizis. Un altri planet, in sumis.

◆ Un altri sburt a rindi la aministrazion publiche plui in armonie cul teritori al è vignût dal valdostan **Luciano Caveri**, za europarlamentâr e sotsegretari cun deleghe aes minorancis linguistichis, che al à sburtât i aministradòrs furlans a creâ, come in Val di Aoste, une liste regionâl dai segretaris comunâi, e a fâ concors publics cun prioritât par cui che al cognòs il furlan.

◆ Cualchidun che al à cualchi probleme come i furlans a son i ladins: **Giuseppe Detomas**, Procuradòr dal Comun gjenerâl di Fascia, uniche realtât sorecomunâl ricognosude cun leç costituzionâl tal 2006, che e met dongje 6 Comuns ladins de Val di Fasse, al à fevelât de discrepanza tra lis normis di tutele e la lôr aplicazion, tant al è vèr che i ladins a son ancjemò in spiete de cjarte di identitât bilengâl, par chist l'impegn al à di jessi continui. Probleme che al è anje in Friùl, che al podarès vè dirit ae stesse robe, ma almancul lôr si lamentin.

◆ In cjase nestre i dirits ricognosûts pai slovens ju à ricuardâts **Erika Hrovatin**, titolâr de Posizion Organizative dal Ufici Centrâl par la lenghe slovene, referent par 32 ents tra Comuns, Aziendis Sanitariis e Cjamaris di Cumierç. In 6 Comuns de Regjon al esist il bilinguism perfet, dulà che ducj i ats a son scrits par sloven e par talian. L'Ufici al ufri servizis di interpretariât, studi e consulence, e dal 2018 al è il riferiment de rê tra ents che ur permet di acedi a fonts suplementâts pal ús dal sloven: une esperience che e sta permetint ai Comuns cuntune minorance slovene di sintisi plui unîts.

ESPERIENCIS FURLANIS

Par chel che al inten lis esperiencis in Friùl, il president de Agjenzie Regionâl pe Lenghe Furlane (ARLeF) **Eros Cisilino** al à ricuardât che «a son esperiencis interessantis, come chê dal cuarp di Polizie locâl di Tumieç che al rispuint par furlan al telefon, ma e covente una pianificazion di chetis iniziativis

par rindilis organichis.»

◆ Lis prospetivis pal ús dal furlan te aministrazion publiche a son stadis ilustradis di **Enrico Torresin** de ARLeF, che al à fevelât dai 3 progjets obietif previodûts dal gnûf Plan di Politiche Linguistiche pal furlan fat bon di resint.

◆ Il plan al è stât ricuardât anje dal assessôr regionâl aes lenghis minoritariis **Pierpaolo Roberti** che al à puartât un salût regjstrât par vie che al jere impegnât tai lavòrs de Conference regionâl pe lenghe slovene: Roberti al à dit che la specialitât regionâl e je fondade uniche-mentri su la presince di minorancis linguistichis, che si à di tutelâlis e di promovìlis. Par chist, secont lui al è adeguât il Plan regionâl pal furlan fat bon de Regjon, cun intervent «par 5 milions di euros ad an pai 5 agns che a vegnin», lant plui inlâ de fin di cheste legislature.

IL PLAN DI POLITICHE LINGUISTICHE

I trê progjets obietif dal Plan di Politiche linguistiche pal furlan, par chel che al inten la publiche aministrazion, a rivuardin i segnâi stradâi e dai uficis, la formazion dal

personâl pe cognossince de lenghe e dai dirits linguisticis, e i servizis pai sîts internet e altris tecnologjîs. Su chist, il president de ACLiF **Markus Maurmair** al à ricuardât che la Assemblee e à realizât un rispuidôr automatic che al è a disposizion dai Comuns e che al à za vût 14 sottoscrizions di bande di aministrazions locâls; in curt – al à zontât Maurmair – ACLiF e produserà un vessil che al podarà jessi usât dai sindics intes manifestazions uficiâls.

◆ L'intervent finâl de cunvigne al è stât chel dal President dal Consei regionâl dal Friùl-Vignesie Julie Piero Mauro Zanin che al à marcât la impuartance de tutele des minorancis linguistichis dal pont di viste de promozion dal teritori e dal svilup inteljetif parcè che la cognossince di plui lenghis e slargje lis capacitât cognitivis. Pai furlans – al à dit Zanin – al podarès lâ ben un model compagn di chel de scuele ladine, che al previôt, almancul intes elementârs, di doprà un alternance talian e ladin tant che lenghis veicolârs di insegnament.

LIS CONCLUSIONS

«Al è stât un incuintri una vore ope-

ratif cun tancj stimui» e a comentât ae fin **Alessandra Vanone** dal diretif ACLiF, che e à condusût i lavòrs cul president Maurmair.

«O vin vude la conferme che o vin di stiçà la domande di dirits linguisticis di bande dai citadins, sburtant la tutele dal furlan inte ativitât de publiche aministrazion cence esitazions e pendolaments, par fâ capì che a puedin dà un contribût determinant pe tutele de nestre autonomie come Regjon, e di cheste autonomie a vegnin fûr cetantis oportunitâts pai nestrìs citadins». ■



IL PRESIDENT DE ARLEF, EROS CISILINO

«O viôt plui convinzion sul furlan di bande des istituzions»



Par fâ il pont su la cunvigne o vin sintût il president de ACLiF, Markus Maurmair.

President, coventie une cunvigne par sburtâ i nestrìs aministradòrs a jessi plui coragjòs sul furlan?

Nol è un pecjât copiâ, e duncje o vin decidût di fâle par cognossi buinis praticichis che si fasin in altris puecj. Nò o vin tant di recuperâ, magari cussì no: par cumò o sin un pôc i ultins de classe fra lis realtâts che o vin dât adun.

Cuale ise la realtât di viodi tant che model?

O vin di cjapâ di dutis ce che a àn di interessant. De Val di Aoste l'elenc regionâl dai segretaris comunâi che a àn di vè competence linguistiche par francès. Al covente par mantignì puecj di vore in Regjon e par ridusi la diaspore di int che e fâs trê agns chenti e dopo e va vie. Po dopo e je interessante la scuele ladine, cul insegnament par ladin alternât cul talian anje dentri dal percors di studi. Par esempi: cualchi an tu imparis la matematiche par ladin, cualchi an par talian. Cussì tu âs sù pai dèts la materie in dutis lis lenghis. No stoi a fevelâ di Sudtiròl, adiriture a fasin il censiment di ce grup linguistic che tu sês, e i puecj publics a son assegnâts in proporzion.

Sperin che l'esempi al coventi par sburtâ i nestrìs aministradòrs: daùr des intervistis che o vin fat chest an, la cussience di jessi furlans e je clopadiçe...

O sin sul tacâ di un percors. Intai ultins agns si jere un pôc pierdude une atenzion vere pe lenghe, pe culture furlane e pe nestre apartignince. Chel che o stin fasint al è semenâ. O soi fiduciôs che fra cualchi an lis intervistis a savaran dà rispuestis che a confuartin di plui.

A passe 20 agns de leç 482 di tutele, la scuele par furlan no partìs, la Rai nancje, a son simpri mancul i fruts tirâts sù par furlan. Lis risorsis no son mai decisivis: coventino dome a lâ viers di une muart cuiete dal furlan?

Al sta anje ai furlans decidi ce che a vuelin. Lis istituzions a puedin dà una direzion, ma ogni societât dopo e decìt il so percors. Jo o viôt di bande de politiche une gnove convinzion e cussience su lis lenghis minoritariis, anje parcè che si sta rindint cont che a son una robe che e covente par mantignì la specialitât. E par chist, che mal fasi dî, e à coventât una vore la ACLiF. ■

**Par viodi chei altris contignûts
de “La Patrie dal Friûl”,**

abonaitsi. Dutis lis informazions si cjatin sul sît
www.lapatriedalfriul.org



**Per vedere gli altri contenuti
de “La Patrie dal Friûl”,**

abbonatevi. Tutte le informazioni si trovano sul sito
www.lapatriedalfriul.org

Che tu sedis za abonât o che tu le vedis lete dome cualchi volte,
aboniti o rinove l'abonament a un mensîl unic:

almancul une volte al mês, lei par furlan!

